

Protest za spas kanjona Ljute

12 June 2013

Par stotina građana, uglavnom planinara, ekoloških aktivista i poštovaoca prirode, učestvovalo je u mirnim protestima koji su održani 06.06.2013. godine u Sarajevu. Nezadovoljni građani su izrazili svoje negodovanje zbog izdavanja okolinskih dozvola za gradnju visokih brana na rijeci Ljuta u općini Konjic.

Građani su mirnom akcijom od Ambasade Slovenije do zgrade Federalnog ministarstva okoliša i turizma poručili kako su nezadovoljni ovakvom odlukom ministarstva, ali i generanim odnosom nadležnih institucija prema prirodnim vrijednostima. Nakon što je Federalno ministarstvo okoliša i turizma izdalo okolinske dozvole, kojima se preduzima Turbinarni iz Slovenije dozvoljava izgradnja triju visokih brana u kanjonu Ljute, u prostoru budućeg nacionalnog parka "Bjelica - Igman - Treskavica - Visočica", preko dvadeset organizacija se ujedinilo sa namjerom da skrene pažnju javnosti na ovu i slične odluke ministarstva. Izdavanje okolinskih dozvola za gradnju brana na Ljutoj je samo korak koja je prelila čašu, obzirom da Federalno ministarstvo okoliša i turizma već duže vrijeme ne radi na zaštiti prirodnih vrijednosti. Tim povodom su organizatori protesta uputili i konkretne zahtjeve na adresu ministarstva:

- Da u roku od trideset dana poništi okolinske dozvole za elektrane sa akumulacijama "Memići", "Dindovi" i "Donje Lukovi" na Ljutoj, (UP I 05/2-23-11-54/12, UP I 05/2-23-11-55/12, UP I 05/2-23-11-53/12), a koje je izdalo ministarstvo;
- Da hitno uputi u proceduru Prijedlog zakona o Nacionalnom parku "Bjelica - Igman - Treskavica - kanjon Rakitnice (Visočica)";
- Da obezbijedi trajnu i valjanu zakonsku zaštitu prirodnih vrijednosti unutar postojećih zaštićenih područja, kao i onih koja su planirana za zaštitu aktualnim Prostornim planom FBiH, tako što će Zakon o zaštiti prirode biti dopunjen odredbama koje će onemogućiti bilo kakvu eksploataciju resursa unutar zaštićenih područja protivnu standardima EU i IUCN-a;
- Da ubuduće sve odluke koje se tiču okoliša, kao i postupke izdavanja okolinskih dozvola, donosi transparentno i uz puno učesništvo i uvažavanje mišljenja javnosti; Nakon protesta oglasila se i glasnogovornica ministarstva koja je za novinsku kuću FENA izjavila: "Zahtjevi su jučer zaista kasno stigli na našu adresu, zbog čega nismo ta prije mogli poduzeti, ali smo sve potpisnike obavijestili da su zahtjevi uzeti u razmatranje od Federalnog ministarstva okoliša i turizma, te da ćemo ih o svemu blagovremeno izvjestiti". Ono što je sasvim izvjesno jeste da će zaštitari okoliša, okupljeni iz raznih organizacija i udruženja, nastaviti svoje aktivnosti sve do ispunjenja upućenih zahtjeva.